

مسرحية تجريبية

المنشأ

تأليف: السيد حافظ

الشخصيات

- ١ - إبراهيم
- ٢ - عوض "ابن إبراهيم"
- ٣ - مريم أم مرقص
- ٤ - شاهدة أم توفيق
- ٥ - عريضة زوجه إبراهيم
- ٦ - مرقص
- ٧ - توفيق
- ٨ - لطفى
- ٩ - سرير
- ١٠ - منشار

لكى تتقدم الأفكار وتحسن الأحوال لابد من التجربة
للكشف عن المواهب القادرة

عبدالله النديم

إهداء

انتفض تناقضك المتناسك بفزع
اغتسل فى الحوارى المملوءة بالضجيج
مصر
كل الفقافيع من حولى تبصقتى
أن أبصق شيئاً .. هذا موقف سطحى
سيجهدنى البصاق .. ومعارك القرف
يهمنى أن أقرأ وجهك
وجهك قاموس .. البراءة
أقرأ .. السطح .. العمق .. مفردات التجاهل .. إشارات السحق .. حروف الخطر
معانى التشدق
وجهك قاموس .. الغضب
ياحبى الأبدى
أمتص من ضلوعك سحر العواطف .. حنين المطر
يامصر
أحتمل السفر والخطر والموت البطئ
لكى أحمل للأطفال .. لمواكب القادمين

كلمة

الكلمة النحت فى الصخر
الكلمة..النقل للتوحد
الكلمة..التضجر للمسيرة
الكلمة ..الترسيب ..العقيدة
أحمل لهم ..فى فؤوس الفلاحين ..معنى آخر
أحمل فى أرضهم بذور ..القدوم
أحمل لهم فى ضجيج الماكينات
الاكتفاء ..والنمو
أحمل لهؤلاء البسطاء المطحونين
الكلمة الخفية المضيفة بالبشارة
أحمل لك يا مصر
الشمول ..لا تعطينى أى شئ..الآن ..دعنى أعطيك
أن يرفضوا عطائى
لا يهم
فالضحالة أنبتت فى الآذان والعيون والرؤوس
وآفة الضحالة ..الرفض السطحى
والحد والتجاهل ..ياحبى ..استمر ..استمر
رغم كل شئ ..استمر رغم أى شئ..لأنى أحبك
أعبدك ..
إلى أمى ..من قرية الضهرية - خرجت
وعشقت مصر
وعلمتنا عشقها

السيد حافظ

القاهرة ١٩٩١

المسرح مابين المستوى الأول والمستوى الثانى :
يقف إبراهيم ممسكا عصاة لاففاً فى آخرها قطعة قماش .. يضعها فى إناء من صفيح
يغسل به سريرا خشبيا مفككا .

الديكور على المسرح :
شرفة تطل على الحارة .. منازل .. نوافذ مغلقة مفتوحة .. الشرفة تستخدم على
المسرح

عند فتح الستار نجد إبراهيم يغسل السرير وهو شاب فى العشرين من العمر،
السرير قديم .. ألواح الخشبية متسخة .. تقف فى الشرفة مريم (جارتهم) تجلس
أمامه شاهدة أخته .. مريم تراقب إبراهيم وتتحدث معه وهو فى الشارع .. فى
الحارة .. يلعب طفلان .. مرقص ابن مريم وتوفيق ابن شاهدة .

مريم : (تنادى ابنها) يا ولد يا مرقص .. اطلع يللا ..
مرقص : لا مش طالع . (يلعب بالكرة مع توفيق) أنا بالعب .
شاهدة : سيبي العيال يلعبوا شوية يأم مرقص
مريم : أصل العيال مشاكلهم ما بتخلصش
إبراهيم : مش عيال .. خليه يلعبوا يأم مرقص
مريم : إيه ده يا إبراهيم .. بتعمل إيه؟
إبراهيم : زى مانتى شايفة .. باغسل السرير .. بس إيه سرير محترم
شاهدة : ولا محترم ولا حاجة
إبراهيم : ده بيقولوا صاحبه كان راجل محترم .. مات شهيد
مريم : وكمان شهيد .. طب مات فين ؟ ..
إبراهيم : فى الحرب
شاهدة : ياسا تر يارب
إبراهيم : عايز أخلص وأطلع بالعربية على البحر
شاهدة : حمارك عجز يا إبراهيم .. وبلاش يجر حمولتين فى اليوم
مريم : يا مرقص رايح فين ..؟
مرقص : رايح ألعب مع ويصة على بحر المحمودية
مريم : لا... خليك هنا أحسن الترفة بعيد

إبراهيم	: مراقب الحمير والعربيات زمانه مشى
شاهنده	: مشى راح فين...!!؟
إبراهيم	: جوزك بسبع أرواح ..هيروح فين تلاقيه هنا واللا هنا
مريم	: والشهيد ده مات فى أنهو حرب يا إبراهيم ..؟
إبراهيم	: ما اعرفش ماهى الحروب كثيرة ..البابنة والمتخفية
شاهنده	: شهيد يعنى ميت
إبراهيم	: طبعاً ..إيه رأيك فى خشب السرير ...حلو..؟
شاهنده	: حلو
إبراهيم	: وأنا ماشى بالعربية فى سوق العطارين ..لقيت واحدة ست لابسة أسود بتنادى عليه..وبتقوللى اطلع ..أفكرتنى بتاع روبايكيا..وقالتلى تشتري السرير ده بكام ..قلت لها بعشرة جنيه ..وأندبست ودفعتهم ..وأنا شايل السرير ونازل فرحان ..قلت أهو ينفع حلو بس عليه شوية وساخة ..يتنظف وأحطه فى الأوضة بتاعتى لقيت الست بتعيط وتقوللى ..خلى بالك من السرير..ده سرير الشهيد
شاهنده	: عشرة جنيه يا إبراهيم ..دفعتهم حتة واحدة...؟
مريم	: لا مش غالى ..ياولد يامرقص خليك هنا ماتروحش لبعيد
إبراهيم	: ده خشبه كويس قوى
مريم	: مبروك عليك ..جميل ياخويا ..حلو قوى ..تعيش وتجب
إبراهيم	: متشكرين يأم مرقص ..ياطيبة ياأميرة
	(فى منتصف المسرح ..منطقة مظلمة ..يحاول الأطفال الاقتراب منها)
مريم	: يامرقص ..ياتوفيق ..ماتروحوش بعيد خليك هنا
توفيق	: حاضر أصل مرقص عايز يلعب هناك
شاهنده	: لا أنت ولا مرقص ..تروحوا بعيد
إبراهيم	: كل شئ حيبقى عال ..بكرة الزمن يحلو معايا وأبقى تمام التمام وأبقى فارس همام ولا أبوزيد الهلالى ..واللا الشاطر حسن ..الصحة ياأبو
	خيمة زرقة (الصحة كنز ..ربنا عاطيها للفقير والغنى)
شاهنده	: والأغنياء عيانين

- إبراهيم : مش كلهم
شاهنده : لا كلهم
إبراهيم : (يمد يده ويغسل لوحاً آخر) فوتك فى الكلام ..العمارة اللى اشتريت
منها السرير عمارة كبيرة قوى فى شارع سعد زغلول ..فيها ناس أغنيا
قوى ..الغريب الدور الأول كله دكاترة .
مريم : لازم الأغنيا اللى ساكنينها بيזורوا الدكاتره
شاهنده : لا وانتى الصادقة ..الدكاتره هما اللى قالوا عشان حنلاقى زباين
جاهزين فى العمارة
إبراهيم : والله صحيح ..البواب قاللى إن الدكاتره بينزلوا عند الأغنياء يعالجوا
سكان البيت
مريم : أصل ربنا بيدى كل واحد على قد رزقه ..دا صحة ..ودا فلوس
شاهنده : ياولد ياتوفيق ماتلعيش بعيد
مرقص : يا امه الواد توفيق مش عاوز يلعب معايا
توفيق : مرقص بيغلس عليا
شاهنده : عيب يااولاد العبوا مع بعض انتوا اخوات
مريم : أنا عارفه ..ابنى غلس
شاهنده : ابنى أنا اللى شقى
إبراهيم : دول عيال ..دلوقتى يتخاصموا ..كمان شوية يتصالحوا ويلعبوا تانى
(يذهب إليهم)
شاهنده : ياأولاد العبوا مع بعض وخليكوا كويسين ..سيبهم انت وتعالى بس
إبراهيم : (يعود للسرير) عيب السرير إنه وسخ شوية
شاهنده : (تمسك لوحاً من الخشب) الخشب باين عليه مسوس
مريم : مسوس ..معقولة...؟
إبراهيم : مسوس إيه ..دا خشب محترم ..دا سرير شهيد
شاهنده : (تنظر للخشب مرة أخرى) مسوس أهه ..بص
إبراهيم : مسوس إيه ياولية...بصى كويس ..حرام عليكى دا أنا ح اغسله
وأديله وش يبقى تمام

- شاهنده : مش قصدى ياخويا
- مريم : انت مش عارف شاهنده ..دايما تحب تهزر
- إبراهيم : قال مسوس قال ..ما كنتش سوسه اللي فى لوح دى ياويليه..قولى
وسخ شوية معلىش ..مش بالذمة السرير دا أحلى من اللي بتنامى عليه
انتى وجوزك ..انطقى اتكلمى
- شاهنده : (تخاف منه) أحلى ياخويا
- إبراهيم : صحيح أنا شاريه قديم شوية..لكن إيه يغنىلما يبقى فى لوح فيه
سوسة و بالغسيل تموت ..وبعدين حادهنه وش بوية ..كيلو بوية زيت
وأدهنه
- مريم : حقه.. أوضتك حاتبقى حلوة قوى ياإبراهيم ..سرير حلو ودولاب
بجرايه وكنبه ..عال قوى قوى ..ناقص بقى عريضة تيجى .
- إبراهيم : عريضة أحلى بنت على ترعة المحمودية ..أحلى بنت فى غربال
- شاهنده : ياواد يامرقص ..ياولد ياتوفيق
(الطفلان يتشاجران على كرة القدم)
(سن الأطفال ٦ سنوات وهى سن متقارب)
- توفيق : والله ما انا سايبك
- مرقص : أنا اللي مش حاسيبك
- شاهنده : (تمنع الأطفال هى وإبراهيم وهما يتشاجران)
(يجرى الولدان ويدخلان فى منطقة مظلمة فى الحارة)
- شاهنده : والله لا أنا دبحاك يا توفيق
- مريم : ياشيخه سيبيهم يلعبوا ..دلوقتى يتصالحوا دول عيال
- إبراهيم : ماتبس ياواد أنت وهو ..بكرة الجيش يريكم
- مريم : حقه انت ما صدقت خلصت الجيش ياإبراهيم ؟
- إبراهيم : أنا كنت "بحريه" ..ودخلت بواسطه كبيرة
- شاهنده : ماتنساش تبقى تعزم أم مريم..وتتوصى بالجاتوه
- مريم : انتى سميتيه جاتوه زى بتوع محطة الرمل ..اسمه بسطه (تضحكان)
- شاهنده : بسطه واللا جاتوه كله واحد

- مريم : ان شاء الله نفرح بيه الأول ..وبعدين بابنه
- شاهنده : ابن واحد وبنت واحد
- إبراهيم : لا عشرة ..ها خلف عشرة ..عزوة ليا ..ضهر ليا ..
- مريم : تحب البنات واللا الولاد
- إبراهيم : كل اللي يجيبه ربنا كويس ..
- مريم : ياولد يا مرقص ..ياولد يا توفيق ..العيال راحوا فين ..؟
- (يخرج طفلان فى سن ٨ سنوات هما مرقص وتوفيق)
- مرقص : عايزه حاجة يأمه....؟
- توفيق : عايزين إيه .. احنا بنلعب ماتش ..وحنقلبهم إن شاء الله
- مريم : ماتلعبوش بعيد (الأطفال ٨ سنوات يختفيان مع الكرة)
- إبراهيم : (مازال يغسل اللوح) السرير دا مش بتاع شهيد
- شاهنده : أمال بتاع إيه؟
- إبراهيم : الظاهر دا بتاع العسكرى المراسلة بتاع الشهيد ..لأن الشهيد مش ممكن يبقى سريره كده ..شكله وريحته
- مريم : هو الشهيد كان ظابط...؟
- إبراهيم : ما اعرفش ..بس العمارة اللي ساكن فيها بتقول انه غنى
- مريم : يمكن كان عازب
- شاهنده : صح ..لازم كان عازب
- مريم : ومالقاش حد يغسل له هدومه ..واللا يحضر له لقمته وينضيفها له
- إبراهيم : ما هو انا اتجوزت وخلفت ومن ساعتها عمال انضف فى السرير ما بينضيفش
- (يغسل إبراهيم اللوح بشدة وفجأة يتعب)
- شاهنده : مالك ياخويا....؟
- إبراهيم : مفيش (يمسح عرقه)
- مريم : مالك ياإبراهيم تعبان واللا إيه....؟
- شاهنده : مالك تعبان كده..؟

إبراهيم	: مفيش
	(يمر لطفى فى الشارع .. لطفى فى الأربعينات وهو عربى صاحب عربية بحمار)
لطفى	: إيه فيه إيه يا إبراهيم يابن الحداد
شاهنده	: بطل هزار يالطفى شوية الراجل معانا
لطفى	: قلت لك بلاش تنظف السرير ..بقى لك سنتين ..اتجوزت وخلفت عيلين ولسه مصمم تنظف السرير
شاهنده	: انت عارف إبراهيم لما يصمم على حاجة ..والسرير أصله حلو وغالوبتاع شهيد كان شاربه من العطارين من سنين بعشرة جنيه
إبراهيم	: (يهب واقفا لتنظيف السرير) انا جدع قوى وراجل قوى يا لطفى
لطفى	: ماشى يا أبو خليل ..وعلى كل حال لو عايز تبيع السرير بعشرة جنيه اشتره منك
إبراهيم	: ولا بتناشر جنيه
لطفى	: (لطفى يتفحص السرير) عشرة جنيه وانا أنصفه ..واللا مش مهم نضافته
إبراهيم	: النضافة مهمة جدا ..لازم أنصفه ومش بايعه يا لطفى
شاهنده	: مش حبيبه يا لطفى
لطفى	: انا مستعد أشتره بعشرة جنيه ونص علشان خاطر أم توفيق
شاهنده	: توفيق ..فكرتنى ..ياواد يا توفيق ..يا واد يا توفيق
مريم	: السرير يساوى اتناشر جنيه واكثر ..ياواد يا مرقص ..يا مرقص (يدخل مرقص وتوفيق طفلان فى سن ١٢ سنة وقد كبرا وهما يرتديان زى لعب الكرة)
توفيق	: عايزة إيه يا امه بس؟
شاهنده	: من يوم ما لبست لبس الكورة مش عارفة اكلمك
توفيق	: عايزة حاجة؟
مريم	: ياللا يا مرقص
مرقص	: يا امه سيبينى اللعب شويه احنا متعادلين مع الفريق ولازم نغلبهم

- إبراهيم : ماتعملوش مشاكل
مرقص : لا
توفيق : لا (يجريان خارج المسرح)
لطفى : (يمسك ألواح السرير) إيه دا فيه لوح أكبر من لوح فى السرير...؟
إبراهيم : يا راجل ياللى نظرك ضعيف فيه لوح أكبر من لوح
لطفى : اهو .. كل لوح مش طول الثانى
إبراهيم : دا كلام
لطفى : أهو .. أمسك (يمسك لوحا ويضعه بجوار إبراهيم) شوف بص ..
شفته (إبراهيم يمسك اللوح معه ويصاب بدهشة)
إبراهيم : كلامك صحيح ..حاجة غريبة
لطفى : بصى يا شاهنده
شاهنده : والله كلامك صحيح
مريم : معقوله بعد سنين واحنا مش واخدين بالننا
لطفى : سلامه النظر ياإبراهيم
إبراهيم : حاجة غريبة
لطفى : ياخى لما انت رايح تشتري حاجة زى دى كنت قوللى آجى معاك
إبراهيم : حتيجى معايا أنت والحمار..؟
لطفى : أيوه أنا والحمار ..على الأقل حنوفر عليك المشاكل
إبراهيم : يعنى عايز تفهمنى انك بتفهم عنى...!!
لطفى : يعنى انت عايز تفهمنى انك بتشوف كويس .. لا ..أنا عارف أنك
دخلت البحرية أونطه ..كان لك عين مابتشوفش بيها واتطوعت فى
البحرية وضحكت على الحكومة وبعد شوية اكتشفوا أنك بعين واحده
سليمه والثانيه معطوبة ..عطولك مكافأة وطلعوك وبالمكافأة أتجوزت
ياإبراهيم وقلت انك ورثت
شاهنده : بتفتح فى الدفاتر القديمة ليه يالطفى...؟
لطفى : باقوله أساعدك بيأس عليه .. وبعدين ألواح السرير مش مظبوطة
عايزة منشار

مريم : روح هات منشار وبطل غلبه يا لطفى
 لطفى : ماشى كلامك يأم مرقص
 (يخرج لطفى ..إبراهيم ينظر إلى مريم)
 إبراهيم : ماتصدقش الكلام دا يأم مرقص
 مريم : انت عارف لطفى قلبه أبيض ولولا انه بيحبك ..ماكنش قال الكلام دا
 إبراهيم : (ينادى)ياولد ياتوفيق يا ولد يا مرقص
 (يدخل توفيق ومرقص شباب فى سن ١٤ سنه)
 توفيق : تعالى يامرقص نساعدك فى السرير
 مرقص : ياعم إبراهيم السرير دا ممتوش فايده
 إبراهيم : دا سرير شهيد ..ازاى ممتوش فايده يامرقص...؟
 مرقص : لسه عايز تنظفه....؟
 إبراهيم : أيوه
 لطفى : أنا جيت المنشار ..أنشر الزيادة اللى فى اللوح
 إبراهيم : ينوبك ثواب
 لطفى : حاضر
 مرقص : عن إنكم رايعين سيما
 مريم : أنت وتوفيق ...؟
 توفيق : أيوه ياخالتي ..عايزه حاجة ...؟
 مريم : لا يا ضنايا (يخرجان)
 لطفى : (يمسك المنشار وينشر الخشب)
 من عشرين سنة لما جيت اسكندرية نمت على بلاط الرصيف ..سكنت
 فى حى اليهود ..وحى الاجريك...وحى كوم باكير..وشفت
 الانجليز والطلالينه.. وهما مأسورين أيام هتلر ..وشفت الانجليزى حاطط
 الكاب على الباب وهو مع النسوان داخل الديار..اشتغلت فى شركة
 سجائر ..كان المدير العام انجليزى ، ومدير الحسابات يهودى ..ورئيس
 الوردية إجرىكى ..وكل العمال التبعانيين مصريين ..لحد ما جت الثورة
 ..الحال اتغير ..اشتريت العربية والحصان .

- شاهنده : (تحدث مريم) فلسطين دى يا حبيبتي بعيد عننا .. أبويا قالى إن جدى سافرهما ماشى .. خطوتين تبقى فى غزة .. وبعد غزة تعدى تبقى فى فلسطين
- مريم : ما هو أبويا لما "قدس" زار القدس وحج هناك "وقلّى" البلد دى حلوة قوى يابنتى
- شاهنده : أبويا اتولد على المحمودية جنب قصر البرنسياسة .. كنا ساكنين فى كشك صغير من الصفيح
- مريم : تعرفى لما الانجليز مشيوا أبويا زعل قوى .. مش عليهم زعل على حالنا لما بقينا زى اللى تايهين .. قال لما مشى الانجليزى جه مصرى أكثر من الانجليزى
- شاهنده : احنا كده .. قلبنا قاسى .. ما نعرفش نحب بعض لطفى : والترعة قدامى والمراكب رايحة محملة بالطوب والقمح .. والرجالة بتشدها .. كنت باحس أن الدنيا بتمشى زى المراكب رايحة على فين ماتعرفش .
- إبراهيم : يالطفى ياخويا انت غاوى تسيب العربية والحمار وتشتغل مراكبى لطفى : نفسى أرحل من هنا ... أرحل من هنا لبعيد
- إبراهيم : ترحل على فين .. هو الرحيل سهل ... ؟
- لطفى : يمكن أستريح من اللى فى من متاعب
- إبراهيم : ياخويا الواحد منا ما يصدق يلقي له مكان أو متوى يفضل فيها (يدخل مرقص وتوفيق فى سن الـ ١٦ سنة)
- مرقص : مات .. الراجل مات والبلد ضلمه
- توفيق : كنا رايعين السينما حفلة ستة قالوا : العمدة الكبير مات وطلعونا
- شاهنده : مات .. مات ازاي .. معقولة يموت كده .. ؟
- مريم : كلنا حنموت يا شاهنده
- شاهنده : العمدة لما يموت يبقى خراب علينا كلنا
- مريم : آه يا خبتنا من بعدك يا عمدة
- شاهنده : آه يا مصيبتنا من بعدك يا عمدة

لطفى	: يا جماعة وحدوا الله ..كلنا حنموت
إبراهيم	: دى مشكله ..يموت ازاي وأنا لسه بنضف السرير والخشب بوضبه
لطفى	: دا أمر الله
إبراهيم	: ياللا يا ولاد روحوا الجنازة وأنا قاعد هنا أنضف السرير ..وأقطع
	الخشب الزياده
لطفى	: أقطع يا خويا أقطع
	(يخرج الشابان مرقص وتوفيق)
إبراهيم	: زى ما مات تشرشل وهتلر ونابليون ..ومات عرابى وسعد زغلول
	..ومات كل البشر
لطفى	: بقيت حكيم يا إبراهيم
مريم	: آه منكم يارجاله ..مافيكوش حنيه لحد
شاهنده	: الرجاله دول ينسوا أى حاجة وكل حاجة
مريم	: ياقلبكم
لطفى	: الله دى عريضة جاية أهى من بعيد
	(تدخل عريضة الى المسرح ومعها طفل فى الخامسة عشرة)
عريضة	: ما جيتش تتغدى ليه يا إبراهيم
إبراهيم	: أصل من ساعة ما سمعت ان عدينا القناة وانا مش حاسس بعمل إيه
	..بانضف السرير بهمه وأعدل الخشب
عريضة	: ما تشوف ياعوض أبوك
عوض	: ما تعبتش يابه من السرير دا ..ماتسيبه بقى
إبراهيم	: ما اقدرش ..دا سرير شهيد وشاريه من زمان
لطفى	: انا ماليش دعوة بالسرير دا ..لكن أبوك هو السبب
شاهنده	: يا خويا انت ما حدش ضريك على ايدك ..انت اللى جيت واشتغلت
	معانا
مريم	: حقه يالطفى دا قدام عينيه ..انت جيت واشتغلت مع إبراهيم
عريضة	: حتقوم واللا لأ
إبراهيم	: ياوليه استنى شوية عليه ..المنشار فين ؟..

عوض	: المنشار أهه يابه (يناوله المنشار)
إبراهيم	: لازم تعرف تمسك المنشار يا عوض
عوض	: حاضر يابه
إبراهيم	: دا عمك لطفى علمهولى
لطفى	: ياخويا ما تقولشى كده ..اشتغل وخلص وبطل كلام
إبراهيم	: تقولشى الدنيا حتطير ..ما احنا بنشتغل
لطفى	: يا خويا اشتغل
إبراهيم	: آى..آى... (يمسك بطنه)
لطفى	: مالك ياإبراهيم ...؟
عريضة	: الحقوا إبراهيم
مريم	: الحقوا إبراهيم ياناس ..إبراهيم
عوض	: قوم يابه ..يابه ..يابه
	(يدخل مرقص وتوفيق وهما شباب فى سن الثامنة عشرة)
مرقص	: العمده قتلوه وسط الغفر
توفيق	: العالم مش مصدق العمده اتقتل
لطفى	: إبراهيم مات يارجاله
عوض	: ابويا
شاهدة	: آه ياخويا
عوض	: آه يابه
عريضة	: مات ..إبراهيم مات
مريم	: يا عيني الراجل كان قاعد قدامنا
لطفى	: هاتوا السرير ..(يضعونه على السرير ويخرجون به)
	(يجلس عوض مكان أبيه ..يمسك المنشار)
	(يصعد مرقص بجوار امه مريم ..يجلس توفيق بجوار امه)
لطفى	: والله أبوك الله يرحمه كان طيب
عوض	: السرير لازم يتنصف من الوساخه ..احنا دفنا أبويا بصحيح من تلت
	سنين

شاهنة : أربع سنين ..ابوك مات وانت عمال تشتغل ليل ونهار
توفيق : الدولار النهارده بـ ٣٧٠ قرش
مرقص : والريال السعودى بكام ؟..
توفيق : بجنيه
عريضة : تفتكر السرير حينضف يا عوض ؟..
عوض : أنا أهه يأمه مايطلتش شغل فيه

ستار بطئ

السيد حافظ

القاهرة ١٩٩١